


Celebracion di 10 aña di oficialisacion di Papiamentu



ORANJESTAD (AAN): Recientemente den Centro di Bario Noord, a tuma lugar celebracion di 10 aniversario di oficialisacion di Papiamentu como idioma.

Sra. Joyce Pereira, Presidente di Fundacion Lanta Papiamentu a splica cu aña aki ta aña di Papiamentu, proclama desde principio di aña pa celebra hecho cu 10 aña pasa, Papiamentu a bira idioma oficial na Aruba.

E tabata un fiesta double pa motibo cu Fundacion Lanta Papiamentu a cumpli 4 aña. Sra. Pereira a menciona cu e idea di henter aña di Papiamentu y metanan di Fundacion Lanta Papiamentu ta cuadra cu otro, pasobra e meta mas importante ta concientizacion di pueblo riba balor di idioma materno, idioma oficial y idioma nacional di Aruba.

Fundacion Lanta Papiamentu ta celebra e aña aki cu hopi actividad y nan tin mas na caminda. Sra Pereira a bisa e Fundacion lo sigui promove bon uso di Papiamentu, conocimiento riba e idioma, pa asina por tin un actitud mas positivo riba nos idioma materno.

